

# Gränzgänger



Fasnacht 2016

## Am Ranze d'Tricolor – mer fyre 70 Joor !

Was isch e Waggis und was e „Gränzgänger“ ??  
Die Froog stellt sich uns, je älter, je länger !  
Kasch Biecher läse und Wikileak frooge;  
au d` Zyttig weiss nyt, und sunscht isch es glooge !  
S` normalerwys immer gscheit Comité,  
weiss laider in däre Sach au nit vyl meh.  
Dert bisch halt mit 70 no kai Jubilar !  
Prinzipie mien gälte , das isch jo ganz glaar.

Mir aber fyre unsere Runde,  
und hätte so gärn e-n Antwort gfunde !  
Dr Jean-Baptiste z`Ferette vum Centre des Belles Filles  
maint : „pas de problème - faites doch e Selfie“:

Dr „Gränzgänger“ isch aifach, awer öi kompliziert !  
Är het toujours e Mainig, wo parfois schangschiert.  
Il fait öi gärn Spass et raconte vyl Witz,  
la plupart uuer-alt, rarement Gaischesblitz !  
Heureux und zfride isch-er nur uf em Wage,  
am Cortège, wenn-er presque rien nyt muess sage.  
Doch im Clique-Käller ka är referiere,  
bis dr Gips an de Wänd duet implodiere !

Jetzt sin also die „Gränzgänger“ 70 worde !  
S`isch nimm so-n-e wildi, frächi Horde.  
Friehner hänn d`Müettere d`Maitli gwarnt: „Wenn  
d` „Gränzgänger“ kemme, denn renn, Maitli , renn !!  
Doch d`Maitli hänn tapfer sich stopfe loh,  
und mir hän si gärn uf e Wage gno !  
Dänggt hän si aber, die junge Spatze:  
„Au die bikemme no Büüch und e Glatze !“

Hit sinn mir Charmöre nimmi so gfroggt,  
und luege ganz gnau, wär näbe-n- ys hoggt !  
Mit Mieh kasch no uf dr Wage klättere,  
und d`Maitli vo domols sin hit alti . . . ,  
oder pfläage deheim ihri noo eltere Vättere !  
Dasch s`Läabe – s`nutzt nyt, do driber z`wättere.

Friehner als Jungi bisch gärn als in d Knille.  
hit hoggsch am Rhybord zem dräggsaggstargg „chille“!  
Gohsch jetz uf em „ Boulewar“ aine go suffice,  
fahrt gwiss so-n- e Biker Di iber e Huffe !  
Dasch s` Innerstadt-Verkehrskonzept !!  
Froog nit, ebb d`Stadt das iberläbt !!

Mit dr Erfaahrig als Bau-Chef z`Seldwyla  
peilt dr Wessels no gscheiteri Zyyl a!  
uss jedem Mässgrät fir Gschwindigkait  
grinst är als Smiley - är duet aim soo laid !  
(Dr Baschi Dürr macht tapfer mit,  
aber sy Bolizey weiss nit, ob er het, oder nit !?)

Baustelle, wo`s no kaini het,  
e Tämpe-Gsetz fir Trottinett,  
statt Parking-, Wander-Karte als Ersatz,  
Notschloofplätz uf em Bahnhofplatz.  
Helm-Trag- Pflicht fir Holzofe-Begge,  
Passante - Flucht-Rüüm uf Velo-Stregge.  
Uf em Velo – wäge de Gfohre -  
darfsch au nimm in dr Nase bohre !  
Fir alli Fuessgänger in ihrer Zone,  
isch Schritt-Tämpe Vorschrift, wagem ruehiger wohne!

Dr perseenlig Uffenthalt in dr Stadt  
isch toleriert – das isch sauglatt !  
Bi grien darfsch iber d` Strosse laufe,  
Dy Pass muesch zaige, wotsch ebbis kaufe !  
Hesch kain, nimm s` Tram no Weil, Linie 8,  
das hilft fir d`Rueh in dr Stadt – guet Nacht !

E Stadt-Parking z`Basel koschtet 2 Stund lang nyt,  
so hesch fir e Bsuech in leere Lääde gnuet Zyt !  
Dr Zirkus muess ganz wägg vom Rosetal,  
är käm - wo scho ain isch - in Grossrots-Saal.  
Und im Rothuus fählt an fascht jedere Wand  
en Ablaag fir dr gsund Menscheverstand.

Au d` Fasnacht isch in Metamorphose,  
muesch nur bi de Lyt am Cortège lose !  
Linggs und rächts heersch uff dr Gass:  
„Hallo Mann - Mann hasch misch wass ?!“  
Wotsch als Waggis intrigiere,  
muesch e Dictionnaire mitfiehre.  
S`wird gsammlt, was in d`Gugge goht:  
Hejoo, deheim herrscht bitteri Not !  
Die Materialschlacht jedes Joor, die mag-ys,  
drum sin mir au scho lang nimm Waggiis !  
Scho lang hän mir uf Süschee gwäxlet,  
und jedes Joor e Zeedel dräxlet.

Doch jetz mit 70, nundefaahne,  
muess nonemool e Waggis ane !  
Trotz wysse Hoor und s`Gsicht voll Falte,  
hänn mir dr Mumm im Alter bhalte.  
Mir groote als no in Extase,  
sogar mit Lorgnon uf dr Nase !

Au das Joor sin mir uff dr Route:  
als Waggis (c)roulants , pas de doute !  
Im Fescht-Goschdym wänn mir brilliere,  
und 3 Dääg zinfchtig jubiliere !  
Mir fyre im Rössli -Tram mit Pfärd,  
verkehrsoptimiert, ohni bliibende Wärt !

Dr Obma kommandiert salopp:  
Gränzgänger – en voiture !– ab im Galopp !!

---

Vom Määntig znacht bis am Mittwoch demoorge kasch  
uff em Minschterplatz und em Kasärnen-Areal d`Ladärne-  
d`Waagen- und Requisiyten-Uustellig go aaluege!

Kumm doch au in unsere Glygge-Käller  
an dr Theaterstrooss 20

[www.graenzgaenger.ch](http://www.graenzgaenger.ch)